

武英殿聚珍版書

吳興府志卷之五

融堂書解卷二

宋

錢

時

撰

大禹謨

臯陶矢厥謨禹成厥功帝舜申之作大禹臯陶謨益稷
大禹謨臯陶謨益稷其篇名次第自古以然也孔子
序書獨何所見首言臯陶矢厥謨次言禹成厥功特
斷之以帝舜申之之一語嗟夫非聖人安能如此觀
書安能脫去篇章名字獨出真見斷定聖經如此其
的哉臯陶篇曰允迪厥德謨明弼諧是臯陶以謨爲

已任也益稷篇曰予何言予思日孜孜是禹以功爲
已任也此三篇謨爲主則臯陶謨宜居篇首如何大
禹亦以謨名反次諸臯陶之上蓋萬世永賴維禹之
功而三篇之中忠言嘉謨不一而足此書首明克艱
之旨惠吉逆凶之旨善政養民之旨帝屢稱贊之以
至總師之命獨斷斷于斯人禹雖遜之臯陶一則曰
惟汝賢二則曰惟汝賢而先定之志終以不易正以
功謨俱顯不容從于臯陶耳不止言其功而特名之
曰謨冠諸三篇之首所以申之此之謂歟孔子深探

此旨不徇篇次名義直書臯陶矢厥謨禹成厥功帝
舜申之以明大禹臯陶謨益稷之所由作此一申字
如天地造化摹寫不可形容之妙豈後世依經解義
所能及其萬一哉矢陳也申猶伸也益稷篇特因禹
有暨益暨稷之言取以題號書不爲二子而作也故
書序不及二子

曰若稽古大禹曰文命敷于四海祇承于帝

此文命禹之文命也如何卻說祇承于帝孔子贊坤
曰承天而時行坤之德卽乾之德坤之行卽乾之行

此其所以承天也明乎此則知祇承于帝之妙矣此祇承之心無始終無作止無古今所謂克艱者祇承也所謂安汝止者祇承也無一日一時一事一物之不祇承也文命之敷此之謂也禹祇承于帝卽舜重華協于帝但祇承比重華差有輕重此帝王之閒也玩味而自得之

曰后克艱厥后臣克艱厥臣政乃乂黎民敏德

克艱二字正是聖學切的工夫克艱則無須臾而不兢業自始學以至爲賢爲聖皆克艱之積也不克艱

則無往而不放逸自意念微動以至積惡而不可掩
罪大而不可解爲四凶爲桀紂皆不能克艱之積也
吁可畏哉

帝曰兪允若茲嘉言罔攸伏野無遺賢萬邦咸寧稽于
衆舍己從人不虐無告不廢困窮惟帝時克

克艱則無我自然博詢衆謀不徇乎己能舍己見樂
從乎人如是則人之善卽我之善矣嘉言安得而伏
于下賢者安得而遺于野乎克艱則物我一體恩及
無告自然不虐困窮有養自然不廢如是則天地之

閒無一物之失其所矣萬邦安得而不咸寧乎嘉言
罔攸伏野無遺賢者稽于衆舍己從人之符也萬邦
咸寧者不虐無告不廢困窮之應也惟帝時克此不
是舜姑爲此謙辭見得克艱工夫直是不易

益曰都帝德廣運乃聖乃神乃武乃文皇天眷命奄有
四海爲天下君

益聞舜論上節克艱功用惟堯能之于是不覺發歎
稱贊舜之盛德如此得天如此得天下如此皆克艱
之功用不獨堯能然也無所不通曰聖變化不測曰

神剛健不撓曰武條理可觀曰文禹只道克艱二字
舜便推廣此旨歸美于堯益便接此語脈發明廣運
之妙歸美于舜不是當時克艱工夫日用純熟了無
凝滯安能六通四闢如是其妙哉自此以下凡數節
更相發揮袞袞不斷如珠聯星緯讀之使人敬歎自
舜卽位後凡羣臣所稱帝皆是指舜若舜所稱帝卻
是堯惟帝時克是也

禹曰惠迪吉從逆凶惟影響

惠迪順行也禹聞益贊帝復接其語脈而發揮之何

謂順克艱是也何謂逆不克艱是也舜之盛德如此
得天如此得天下如此固克艱之功用也或者兢業
微懈不順而逆則凶咎之來捷如影響此禹所以兼
吉凶兩端申明克艱之旨廣益之所未備拳拳爲帝
舜告也

益曰吁戒哉儆戒無虞罔失法度罔遊于逸罔淫于樂
任賢勿貳去邪勿疑疑謀勿成百志惟熙罔違道以干
百姓之譽罔拂百姓以從己之欲無怠無荒四夷來王
禹聞益盛稱帝德而有惠吉逆凶之戒益一聞之爲

之驚歎曰吁戒哉吁者不可之辭指言從欲之不可
當以爲戒也其閒無非發明克艱之旨以究不可從
逆之意儆戒卽克艱也下復詳言儆戒之目罔失法
度罔遊罔淫勿貳勿疑勿成是謂克艱不然是從逆
也任賢而貳則不專君子之跡危矣去邪而疑必不
斷小人之計行矣舜大聖人法度之失逸樂之過斷
無此事至如九官之命正是不貳四凶之誅正是不
疑罪疑惟輕功疑惟重正是勿成而伯益告戒之辭
不啻若伊周之于太甲成王者何至如是嗟夫此虞

廷之盛所以貴于克艱者歟熙亦有廣明之義百志
惟熙可謂甚善到此復陳于譽從欲之戒恐又有此
二病所以極言之譽者道之符也有道自然有譽違
道如姑息而害仁好施而不知義之類是也去此二
病可謂瑩然無瑕然猶未也一念怠荒百病叢起凜
乎其難保也益到此復申之以無怠無荒蓋如前所
陳尙有事之可指若無怠無荒則應事時如此不應
事時亦如此動靜晝夜如此無時而不克艱也此來
王之機卽黎民敏德之機卽萬邦咸寧之機卽皇天

眷命之機卽吉凶影響之機伯益此章言罔者五言
勿者三言無者二命辭深切立語嚴厲讀之使人毛
骨森竦在舜猶有此戒後世君天下者聞之可不懼
歟

禹曰於帝念哉德惟善政政在養民水火金木土穀惟
修正德利用厚生惟和九功惟敘九敘惟歌戒之用休
董之用威勸之以九歌俾勿壞

觀于政在養民一語而知當日爲治之本也大禹謨
一篇君臣告戒可謂至矣而上下之所以爲治者不

外乎養民也能養民而後可謂之善政此惟禹八年
于外親知民間之疾苦者始克舉以相告也水火金
木土穀皆民生所不可闕者修之只在君上當日庶
績咸熙如平水土之官播穀之官共工之官皆見于
書當必有司火司金如所謂火工金工者五官分司
其職而歸重于穀以重民本纔可謂之惟修正德利
用厚生皆行治之事也觀惟和二字分明有從容不
迫意思卽是行所無事也九功之敘則又有條理整
齊處不是一味寬和此三項互相呼應極有次第缺

一不可此禹從閱歷過來發明爲政之要

帝曰兪地平天成六府三事允治萬世永賴時乃功

帝于是又推原九功之所以得敘實在地平天成之後而歸功于禹是又言臣之所以克艱也前言克艱功用雖無所不備猶是言一時事而此則又言其功用及于萬世嗚呼盡之矣

帝曰格汝禹朕宅帝位三十有三載耄期倦于勤汝惟不怠總朕師

禹之德舜所熟知今欲禪讓令總我衆略無他語止

言其不怠夫舜老而倦筋力不逮故也禹之不怠正是禹平日工夫觀其告君有曰克艱曰安汝止微不
安卽怠也微不克艱卽怠也

禹曰朕德罔克民不依臯陶邁種德德乃降黎民懷之
帝念哉念茲在茲釋茲在茲名言茲在茲允出茲在茲
惟帝念功

邁遠也種如苗之種臯陶曰兢兢業業是其種德之
法也曰愼厥身脩思永是又其邁種德之妙旨也臯
陶士官也惟種此德故其降及于民者亦無非此德

雖刀鋸斧鉞之施皆皐陶種德之地也民之懷之豈是偶然以此得見禹不是姑爲此讓直是深知皐陶直是尊敬皐陶舜卽位之初命宅百揆旣讓于稷契皐陶矣至今禪讓帝位其他皆不及又獨拳拳乎皐陶一人雖不知稷契在與不在然禹之所尊敬而推讓之者舉一世莫有過于斯人者矣語至此又申言曰帝念哉言不可等閒聽過當深念之哉今一念及此只在斯人釋而不念亦只在斯人指名而言只在斯人允出于心亦只在斯人于是又申之曰惟帝念